

## Filimon Nægkiariien sə rani mə nəfe i nəkukuə

Filimon in iəmə asori riti səvəi nakalasia me fwe Kolosi. In riti nəha Pol. Onesimas, in slef riti səvəi Filimon. In rakres mane səvəi Filimon nənə map mevən fwe Rom. Nəpɪn in ramarə fwe Rom, in rətoni Pol, mɪni nɪpərhiɛniɛn ia nəgkiariien səvəi Iesu Kristo. Pol rərhi pen Onesimas ruvehi nəkukuə i mevən muvei pen m Filimon. Pol rəres skai m Filimon mə trəpwəh nərpwɪniɛn noien ərəha səvəi Onesimas nənə mo in rəmwhɛn ia piəvni. Nəkukuə i rukwakwa. Filimon, Efesas, Kolosi, mɪne Filipae kani mə nəkukuə me səvəi kalapus ti nəri nə mə Pol ramarə ia kalapus fwe Rom ia nuk 59-61 mɪrai nəkukuə me i.

<sup>1</sup> \*Iou Pol iakamarə ia kalapus ti nəghi Iesu Kristo. Kimrau piəvtaha Timoti iarouni ramasan tukw ik Filimon. Ik iərmama i kitahar mik samaro pəri wok. Kimrau iarouokeikei ik. <sup>2</sup> \*Nənə iarouni mwi ramasan ti kitirimətaha Apia, mɪne piəvtaha Akipas, iəmə sə kitaha min səmwhɛn ia naruagən me. Iarouni ramasan ti nakalasia me pam nəha səməme kamhousəsimwɪn irəha me ia nəkwai nimwə səim. <sup>3</sup> \*Iarouəfwaki mə Kumwesən tata səkitaha mɪne Iesu Kristo Iərimənu səkitaha trouəriari pehe namasanien mɪne nəmərɪnuiɛn pwəh irau krauarə tukumiaha.

*Pol raməkwein amasan ia Filimon*

---

\* **1:1:** Efes 3:1      \* **1:2:** Kol 4:17, 2Tim 2:3      \* **1:3:** Kal 1:3

<sup>4</sup> \*Filimon. Ia nəpɪn me, nəpɪn rerik ramrhi ik ia nəfwakiien me səiou, iakani vivi Kumwesən, <sup>5</sup> ti nəri nə mə iakamregi kamini nokeikeiien səim sə ikamo m nərmama me pam səvənhi mine nahatətəien səim ikauvehi ia Iesu Iərimənu səkitaha. <sup>6</sup> \*Iakamregi mwi mə ikaməriari ia rerim pam ti nəri nə mə ikamahatətə. Iakəfwaki mə noien nəha trasitu ia niram mo ikukurən amasan mwi narimnari amasan me pam kauvei pehe saməuvehi rauku pen ti Kristo. <sup>7</sup> \*Piak, iakaməfwaki iamɪnhi irə ti nəri nə mə nokeikeiien səim ro nərmama me səvəi Kumwesən rerinraha ragien. Nənə nəpɪn iakregi, iou mwi rerik ragien. Ruvehi utə mwi nətərigien səiou.

### *Nəresien səvəi Pol*

<sup>8</sup> Filimon, iakuə takəres nari riti mik. Iakukurən niniien nəkwak tukw ik ia nəghi Kristo mə nəfe tikaməkeikei mo, <sup>9</sup> \*mətə nokeikeiien səkrau, ko iapko mhə iamɪnhi. Iakuə takəres a ik. Təkwətəkwuni iou Pol iakinərgħarə, nənə rəmwhen iakuvəni raka iakamarə ia kalapus ti Iesu Kristo, <sup>10</sup> \*iakaməres nari riti mik ia nɪkaren səvəi Onesimas,<sup>a</sup> in i səim slef. In ruvehe mətoni iou ia kalapus, nənə iakuvehe məmwhen ia tata səvənhi, in ruvehe nərik. <sup>11</sup> (Fwe kupwən in ripkasitu mhə ia niram, mətə təkwətəkwuni nəha in rukurən nasituien ia krau pəri.)

<sup>12</sup> Təkwətəkwuni iakamərhi pehe iəmə i, iəmə sə iakokeikei pik, rirərig muvehe tukw ik.

---

\* **1:4:** Rom 1:8-9      \* **1:6:** Fil 1:9, Kol 1:9      \* **1:7:** 2Kor 7:4  
 \* **1:9:** Flm 1      \* **1:10:** Kol 4:9, 1Kor 4:15      a **1:10:** Nipwrai  
 nəhag nəha Onesimas in i mə Iəmə sə Ramasitu.

13 \*Iakokeikei mə takəkwtəmhiri əknekɪn ramarə kɪmrau min mə truvehi təmwekɪm, mamo tukwini nari miou nəpɪn iakamarə ia kalapus ti nəgkiariien amasan. 14 \*Mətə iapkokeikei mhə mə tako nari riti sə ipkəsəni mhə irə. Trɪni mɪnuə ikamo nəri amasan iakokeikei mə truku pen ia rerim əgɪen, mətə rɪpko mhə nəri iakaməkeikei mik tukwe mə tiko. 15 Rosi Onesimas rɪnap məp wəh ik nəpɪn ouɪhi a mə tikuvehi mwi rouarə rerɪn kɪmirau min. 16 \*Nənə təkwtək wuni in rɪpko mhə slef əpa riti səim, mətə in rəpi raka slef. In piəvtaha keikei riti. Iou iakokeikei pɪk in, mətə ik tikokeikei pɪk in rəpi raka ti nəri nə mə in slef səim, mətə irənhə mwi irə in piam, ti nəri nə mə in ruvəuvehe mamahatətə ia Iərimənu səkitaha.

17 Ro pen trɪni mɪnuə ikamətə iou rəmwhen ia ik riti sə krauo pəri wok, tikuvehi in ia rerim pam rəmwhen a mə ikauvehi iou. 18 Trɪni mɪnuə rɪno nari riti rərəha ia niram, uə rɪməuvehi nari riti mɪpkuvehi mhə nənimen, tikəmri pen ia kaon səiou. 19 \*Iou, Pol, iakamrai nəgkiariien i ia rəgɪk, iou tapkərəku. (Mətə tikəpwəh nenouenouien mə səim kaon rarə ti nəri nə mə iou iakɪnasitu ia niram ikuvehi nɪmɪruien vi.) 20 Ouəh, piak, iakokeikei mə tikasitu ia nirak, mo rerik rəgɪen, ti nəri nə mə krau pəri krauahatətə ia Kristo Iərimənu səkitaha. 21 Iakamrai nəkukuə i mik, mukurən amasan mə tiko nəkwak. Iakukurən mə tiko rəpi raka nəfe nəghɪn iakaməres i.

22 \*Nənə tikəpnəpenə mwi kwopun riti səiou

---

\* 1:13: Fil 2:30 \* 1:14: 2Kor 9:7, 1Tes 5:2 \* 1:16: 1Tim 6:2

\* 1:19: 1Kor 16:21, Kal 6:11 \* 1:22: Fil 1:25, 2:24

takapri ikin. Iakani iaminihi irə ti nəri nə mə iakameitenhi Kumwesən mə trəsəni nəfwakien me səkimiaha, mo suatuk miou iakrərīg pehe tukumiaha.

*Nəgkiariien sampam səvəi Pol*

<sup>23</sup> \*Epafras i iou riti sə kimrau min iarouarə ia kalapus ti nəghi Iesu Kristo in rini ramasan tukw ik. <sup>24</sup> \*Nənə Mak mine Aristakas, mine Temas, mine Luk iou me nepwin səməme iahamo pəri wok, irəha mwi həni ramasan tukw ik. <sup>25</sup> Iakəfwaki mə namanien səvəi Iesu Kristo lərimənu səkitaaha tramarə tukumiaha.

---

\* **1:23:** Kol 1:7      \* **1:24:** Kol 4:10,14, 1Tim 4:10-11

**Nəkukuə Ikinan**  
**The New Testament in the Nəfe (Kwamera) language**  
**of Southeast Tanna, TAFEA Province, Vanuatu**  
**Niutestamen long lanwis Nəfe blong Vanuatu.**  
**Le Nouveau Testament dans la langue Nəfe de**  
**Vanuatu.**

copyright © 2013 Wycliffe Bible Translators, Inc.

Language: Nəfe (Nəfe)

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-06-18

---

PDF generated using Haiola and XeLaTeX on 11 Nov 2022 from source files dated 30 Nov 2021

26b0f540-c192-5878-be67-18ede9ab1416